



BOSNISKA / BOSANSKI

Sport – dobar start u život

Sport omogućuje djeci i odraslima da se kreću, takmiče i zajedno uživaju. U sportskom udruženju možete osjetiti zajedništvo i pronaći nove prijatelje. Ovdje objašnjavamo kako sport u Švedskoj funkcioniše i kako se postaje član sportskog udruženja.

DOSTUPAN SVIMA

U Švedskoj ima otprilike 19 000 sportskih udruženja i svi koji žele mogu postati članovi. Nije bitno ko ste, odakle ste, koje ste vjere, koji jezik govorite ili gdje u Švedskoj živite. Sportsko

udruženje je otvoreno za sve, djecu i odrasle. Mnoga sportska udruženja srdačno primaju vas koji se želite takmičiti i vas koji se želite baviti sportom i trenirati bez takmičenja.

KOJI SPORTOVI POSTOJE?

Više od tri miliona ljudi u Švedskoj su članovi nekog sportskog udruženja, skoro svaka treća osoba, zato se sport obično naziva „Najveći narodni pokret u Švedskoj“. U cijeloj zemlji postoje sportska udruženja, individualni sportovi kao na primjer, gimnastika, borbeni sportovi ili skijanje i timski sportovi

kao na primjer nogomet, košarka ili hokej na ledu. Neki sportovi su većinom aktualni u toku ljeta a drugi u toku zime. Pitajte svog susjeda, nastavnika fizičkog vaspitanja u školi ili prijatelja i doznajte koji sportovi postoje tamo gdje stanujete i probajte koji vam najviše i najbolje odgovara.

UDRUŽENJA SU VOLONTERSKA

Sva sportska udruženja su u osnovi volonterska. To znači da ne postoji vlasnik ili zahtjev za ostvarivanjem dobiti. Članovi udruženja odlučuju o načinu kako će udruženje obavljati svoj rad i preuzimaju odgovornost za različite zadatke. To na primjer, može biti da se uvečer ili vikendom bude odgovoran za treninge, prodaju u kafiću ili obavljanje poslova funkcionera na takmičenjima u organizaciji sportskog udru-

ženja. Sportska udruženja nisu ista stvar kao privatna preduzeća u kojima zaposleni primaju plaću.

Finansije sportskog udruženja se sastoje od plaćenih članarina članova udruženja i novčane potpore općine i države ali to obično nije dovoljno za plaćanje troškova treninga, prostorija i putovanja na takmičenja. Zato je važno da svi članovi, odrasli i omladina, pomažu kao volonteri.

OVAKO POSTAJETE ČLAN

Skoro sva sportska udruženja imaju svoju web stranicu ili su u društvenim medijima gdje piše koga možete kontaktirati ako želite biti član udruženja. Obično možete najprije nekoliko puta probati sport i vidjeti da li vam odgovara ili ne. Poslije toga morate postati član da bi mogli nastaviti s treningom i takmičenjima u sportskom udruženju.

Da bi postali član udruženja navedite svoje ime i prezime, svoju e-mail adresu,

poštansku adresu i svoj matični broj. Nakon toga plaćate članarinu. Članarina se plaća jedanput godišnje sve dok želite i dalje biti član udruženja. Razlog zašto morate dati svoj matični broj je da je isti ponekad potreban za osiguranja i novčane potpore ali se ne koristi u nekoj drugoj prilici izvan sporta.

Udruženja mogu rukovati podacima osoba koje imaju zaštićeni identitet ili koordinacioni broj.

KOLIKO KOŠTA?

Iznos članarine je različit, ovisno o tome o kom sportu se radi i o mjestu u Švedskoj u kojem stanujete.

Za jedan dio sportova morate sami nabaviti neophodnu opremu. Neki kupuju opremu koja je polovna u second hand prodavaonicama ili preko oglasa na internetu. Jedna druga mogućnost je da pitate svoje sportsko udruženje da li imaju opremu koju možete pozajmiti. Postoje i organizacije koje

pomažu. Jedan primjer je organizacija Fritidsbanken koja besplatno posuđuje sportsku opremu na 14 dana onima koji žele probati neki sport ili aktivnost u slobodno vrijeme.

Iako se plaća da bi se postalo članom u nekom sportskom udruženju ipak ste na dobitku. Dobijate, na primjer: trening, putovanja na takmičenja, zajedništvo, sigurnost i mogućnost da upoznate nove prijatelje.

ČLANOVI ODLUČUJU

Volonterska udruženja su demokratska. To znači da vi kao član imate pravo utjecati na rad sportskog udruženja. Jednom godišnje udruženje ima godišnji sastanak gdje svi članovi koji su platili članarinu zajedno diskutiraju i odlučuju o tome što će udruženje raditi u slijedećoj godini i o načinu korištenja novca.

Na godišnjem sastanku svi članovi imaju svoj glas. Isti možete koristiti da birali ko će biti član upravnog odbora udruženja. Upravni odbor je grupa ljudi odgovorna za to da se udruženje drži postojećih zajedničkih pravila i da sportsko udruženje provodi odluke s godišnjeg sastanka.



Kratka pitanja i odgovori

1. Ko može biti u udruženju?

Odgovor: Cilj sporta je da svi koji žele mogu postati članovi udruženja! Danas to može izgledati različito u udruženjima polazeći od na primjer, vrste treninga i broja mjesta.

2. Da li je sigurno poslati dijete u sportsko udruženje?

Odgovor: Mi radimo sve što možemo da se sva djeca osjećaju sigurno. Postoje obrazovanja za vođe sportskih udruženja o stvaranju sigurne sredine za djecu. Sportska udruženja prate osnovnu vrijednost, zajednička pravila kako se treba međusobno ponašati, kao na primjer da u udruženju ne smije biti maltretiranja, nasilja ili rasizma.

3. Što moram plaćati?

Odgovor: Članarinu i u nekim slučajevima troškove treninga i opreme. Kroz

angažman u udruženju, na primjer obavljanjem poslova funkcionera na takmičenjima ili prodajom lutrije pomažete ograničenju troškova.

4. Zašto treba biti član udruženja?

Odgovor: Zato što time vi i vaše dijete imate šansu da trenirate, dobro se osjećate, da vam je zabavno i da srećete ljude. Za mnoge je sportsko udruženje mjesto gdje imate svoje prijatelje i gdje želiti biti poslije škole ili posla i gdje možete učestvovati, utjecati i biti angažirani zajedno s drugima. Za neke to može biti i put za pristup tržištu rada.

5. Što dobijam kao član?

Odgovor: Kao član imate mogućnost pripadati zajednici, utjecati na rad udruženja i učestvovati u aktivnostima koje se nude svim članovima.

Činjenice RF-SISU

Riksidrottsförbundet (RF) Švedski sportski savez je organizacija koja ujedinjuje sportski pokret i ima zadatak da podržava i razvija sport u Švedskoj. Švedski sportski savez čini 70 specijalnih sportskih saveza, 19 000 sportskih udruženja i otprilike 3,3 miliona članova. RF postoji u cijeloj zemlji na lokalnom i regionalnom nivou.

SISU Idrottsutbildarna (SISU) je obrazovni savez sportskog pokreta. SISU nudi sportskim udruženjima neformalno obrazovanje odraslih i obrazovanje radi pružanja znanja i snage ljudskim mislima i idejama i njihovoj želji za razvojem. I SISU postoji na području cijele zemlje, na lokalnom i regionalnom nivou.



Riječnik

Narodni pokret – Velika grupa ljudi koja ima zajednički interes, organizira se diljem cijele zemlje.

Funkcioner – Osoba u sportskom udruženju koja, na primjer, pomaže na jednom sportskom takmičenju. To se može odnositi na brigu o kiosku, pokazivanje posjetiocima gdje će sjesti ili posao suca koji vodi brigu o tome da se poštuju pravila takmičenja.

Neprofitan / Neprofitno – Udruženje ili organizacija čija aktivnost nije usmjerena stjecanju zarade. Sportsko udruženje je volontersko/neprofitno kroz pomoć i besplatan rad članova udruženja. Sportska udruženja nisu isto kao privatna preduzeća u kojima zaposleni primaju plaću.

Sportsko udruženje – Sportsko udruženje čini grupa ljudi koji zajedno treniraju jedan ili više sportova i idu na takmičenja. Sportsko udruženje obično ima kraticu IF.

Postoje i sportska udruženja koja imaju kraticu IK (sportski klub), IS (sportsko društvo) ili SK (sportklub).

Članarina – Da bi bili u sportskom udruženju morate se učlaniti. Član postajete tako da sportskom udruženju plaćate godišnju članarinu, to jest jedan iznos novca.

Upravni odbor – Svako sportsko udruženje ima jedan upravni odbor izabran na godišnjem sastanku od strane članova udruženja. Zadatak upravnog odbora je da vodi rad udruženja do slijedećeg godišnjeg sastanka.

Godišnji sastanak – Sastanak koji se održava jedanput godišnje za sve članove sportskog udruženja. Svaki član ima svoj glas na godišnjem sastanku. Za vrijeme sastanka se odlučuje o tome koje će osobe biti u upravnom odboru i o planu rada udruženja u slijedećoj godini.